

Ihr seht des Haubtes ziehr/ die vngerichten Haaren/
 Wie sie verstellen mich/ die sonst das schönste waren.
 Ihr sehet mein Gesicht / so vor hin lieb vnd schön/
 Wie es der Mann gefärbt/ mit dem ich fort muß gehn:
 Die Sprache wundert euch/ die euch so lieblich dachte/
 Mit der ich manchem vor etwas zu Wundern machte/
 Wie in dem alter sie so heischer von mir geht/
 Daß ihr ein wörtlein auch wol nahe kaum versteht.
 Vnd was Ihr nur betracht wie ich vorhin gewesen/
 Vnd nun an jz bin/ macht euch die thränen lesen:
 Doch Wundert euch nicht so/ denn eh' ich oben bin/
 Muß alles von mir weg/ was liebet ewer Sinn.
 Vnd daß Ihr euch so sehr hierüber alle kräncket
 Mein Vater/ Mutter/ vnd Geschwister/ weil Ihr dencket
 Das in der ersten Zeit/ wo liebligkeit angeht
 Ihr alle Hoffnung seht/ wie sie todte vor euch steht/
 Ja alle höchste lust/ vnd alle dieses eben/
 Was euch jz noch ein Kind / doch mit der Zeit kan geben/
 Ob jzund niemand dencket worzu vns Gott noch bringt/
 Vnd was Er auß vns macht/ Müst hörn wie man ihm singt.
 (Ob Ihr zwar keines wolt) O Welt ich muß dich lassen/
 So bitt' ich last in euch doch die Vernunfft diß fassen/
 Was ich vor Ungelück noch müste stehen auß/
 Wie mir zu leiden wär/ manch harter Windes sauß.
 Vnd wann volk ömlich auch ich nun erlernet hette
 Die Künst' in aller Welt/ das ich auch in die wette
 Mich möchte sicherlich mit andern lassen ein/
 Vnd dächt' in allem doch noch Oberherr zu sein/
 Ob sie auch wären viel/ vnd dann das Glücke käme
 Vnd mich biß an den Ort der höchsten wörden nähme/
 Das keiner gleichete mir / vnd dann der blasse neidt
 Sich spinn' auß meiner Kunst/ vnd brächte meine zeit
 Wie mir zu sterben wär/ da er durch Giffte vergeben/
 Auch durch den blancken Stahl mir kürzte dieses Leben